

11/11



萬曆杭州府志卷之七十四

人物八

先朝政業

六朝梁

范述曾字子元一字穎彥錢唐人幼從餘杭呂道惠受五經道惠曰此子必為王者師齊文惠太子竟陵文宣王幼時齊高帝引述曾為之師友起家為宋晉熙王國侍郎齊初至南郡王國郎中令遷太子步兵校尉述曾為人蹇諤在官所多諫爭竟陵王深相器重號為周舍沈約亦以述曾方汲黯明帝即位為永嘉太守為政清平不尚威猛毗俗便



之所部橫陽縣山谷嶮峻為逋逃所聚前後二千石討捕莫能息述曾下車開示恩信凡諸凶黨襁負而出編戶屬籍者二百餘家自是居人安業勵志清白不受饋遺帝下詔褒美召為游擊將軍郡送故舊錢二十餘萬一無所受惟得白桐木火籠朴十餘枚而已吏無荷檐者起行之日民無老少皆出拜辭號哭聞數十里東昏時拜中散大夫歸里梁武帝踐阼乃輕行詣闕仍辭歸詔曰述曾昔在齊世忠直奉主往泄永嘉治身廉約宜加禮秩以厲清操可太中大夫述曾生平所得俸祿皆以分施及老壁立無資天監八年卒注易文言著雜詩賦數十篇

宋

謝濤字濟之富陽人登進士為梓州推鹽院判官李順反成都濤畫計守禦以功遷觀察推官權知華陽縣亂後田廬荒廢詔有能占田而倍入租者與之於是腴田率為豪右所占民無所歸濤收詔書悉以田歸主改著作佐郎知興國軍真宗考吏籍內出朝士有治迹者二十四人名副中書門下省濤在選中召對長春殿賜五品服契丹入寇議親

征以濤知曹州賦稅移輸睢陽助兵食是歲霖潦民苦轉送濤請以他漕運過睢陽者餉軍留曹賦由廣濟河以餽京師詔從之使益利兩路回舉所部三十餘人宰相疑其多濤乃陳諸吏治狀願連坐奉使舉官連坐自濤始後官至太子賓客卒范仲淹稱濤清淨而文子絳自有傳

謝絳字希深以父任試秘書省校書郎舉進士甲科授奉禮郎知汝陰縣善議論喜談時事嘗論四民失業累數千言楊億薦其人召試擢秘閣校理監登聞鼓院與修真宗國史遷祠部員外郎直集賢

院以父濤官西京且老請通判河南府移書丞相言歲凶嵩山宮宜勿治絳雖在外猶數論事上書言妖人方術士不宜出入禁中權開封府推官言蝗亘野入郭宜用京房息災異之術考功課吏除煩苛損聚歛弗起大獄勿用躁人郭后廢引申后褒姒事以諷徙度支判官言用物滋侈賜予過制禁中須索去年用緡錢四十五萬今春至四月已二十萬宜過考歲用裁節初詔罷織密花透背禁人服用既而內人賜衣復取於有司又後苑作玳瑁噐索龜筒龜筒禁物民間不得有而索之不巳

絳皆論罷之又請罷內降詔令皆由中書樞密然
後行知制誥判流內銓舊擬官圭田不均絳覈其
實以多寡爲差知鄧州修復召信臣六堰壅水溉
田未就而卒絳以文學知名修潔醜藉平居晏然
臨事果敢節操凜如所至大興學舍嘗請諸郡立
學好施宗族喜賓客卒之日家無餘貲子景初景
溫景平

錢彥遠字子高以父任爲太廟齋郎太理寺丞復舉
進士又舉賢良方正策入等由太常博士授祠部
員外郎慶曆七年知潤州因災異上疏極言國家

備寇之術未至牧民之吏未良天下之民未安西
北二虜我之堅敵今北戎據幽燕山後元昊盜靈
武銀夏皆我之州郡伺我間隙收我亡叛非止驅
掠而已往時元昊內寇天下騷然及納款賜命則
臨邊長吏不復銓擇一日契丹乘利入塞豈特元
昊之比邪又湖廣蠻獠戕害劫掠生民流離調發
督餉軍須百出置之不問其憂不細惟陛下念此
三方講長久之計以安元元性命大凡牧長之吏
生民之慘舒休戚繫焉守令失則一方敝利害切
於身饑寒逼於肉彼不起爲盜賊則當危厄愁苦

而死危厄愁苦之氣所以致水旱臣願精擇天下
長吏此根本之論也時旱蝗民乏食彥遠在潤發
常平倉賑救部使者詰其專彥遠不爲屈召爲右
司諫請罷數赦擇牧州守增俸入以養廉吏息土
木以省工費遷起居舍人直集賢院知諫院時楊
懷敏妄言契丹宗真死乃除入內副都知內侍黎
用信以罪竄海島赦歸遽得環衛官皆上疏極論
之又言楊景宗郭承祐皆闖茸小人宜廢不用多
見聽納彥遠性豪邁其任言職數有建明卒年三
十七

沈文通名邁因犯高宗嫌名以字行貫見名宦傳祖
同進士起家父扶皆顯官文通以祖陰補齋郎皇
祐元年舉進士第一以旣仕降第二遂爲故事除
大理評事通判江寧府遷著作佐郎奏本治論十
卷仁宗語侍臣曰近率以詩賦獻而沈邁本治論
可用也召試除太常丞集賢校理三司度支判官
時以科名入館者每不次用惟文通在三司四年
始除修起居注人以此稱其賢除右正言知制誥
糾察在京刑獄出知越州始作學以館諸生徒知
杭州遷吏部郎中英宗召見勞問知開封府遷右

諫議大夫翰林學士羣牧使兼權吏部流內銓丁
毋憂廬墓側無何卒文通少爽邁讀書一閱輒釋
通達世務治杭鋤奸蠹獎賢良後領開封人曰此
杭州沈公也每晨視事日中則庭無留人與賓客
飲笑終日京師帖然每問其佐曰幸告我以過無
媿直言人或告之雖言有不當亦降色妥詞以受
政號嚴明時有縱舍於良善貧弱撫恤尤至爲文
下筆立就而知之者少及爲制誥遂以文學稱天
下有西溪集十卷子二隆嗣賢嗣

善曰昔武侯相蜀下教國中每令勤攻已闕夫武
侯相業所以光百世者以是也乃文通樂聞已過
至溫言以誘之彼其中恢恢無畔岬矣豈伎善護
前者可同日語耶

凌景夏字季文餘杭人紹興二年對策第二呂頤浩
稱其詞勝于張九成任紹興府觀察推官帥綦宗
禮薦于上擢秘書正字遷著作佐郎與館職吳瑄
朱松張廣常明范如圭等六人共奏封事言和議
非便秦檜憾之除工部員外郎斥知外郡後落職
閑居凡十餘年檜死除起居舍人兼權給事中景
夏言紹興二十一年詔臨安府見推排等第依在

京例與免今有司乃以和買役錢難以減放止與西北流寓人蠲除土著人戶反成偏重夫土著流寓皆陛下赤子德澤之施實先京師契勘兩縣在城營運浮財物力所輸和買絹數止二千六百餘匹望依已降指揮並與蠲免庶使德澤無偏詔令有信上從之遷中書舍人未幾直龍圖閣知撫州遷知襄陽府知鼎州奏免程昌禹所增蔡州官兵衣糧六萬四千餘緡詔減四分之一徙宣州加集賢殿修撰除吏部侍郎言慶曆三年編定勲臣凡二百四家迨建中靖國元年續編一百一十六家

許子孫陳乞恩澤臣竊謂崇德以來至陛下卽位經涉艱難社稷捍牧圉者畧而未編亦一闕也望檢會崇觀以後勲業者於國史者接續編定以勸忠烈事下吏部後不果行文奏論吏部七司有法有例法可按籍而觀例則散於案牘之中匿於胥吏之手官有去來不能遽知故索例而不獲雖有強明健決之才不復敢議臣愚以爲吏部七司宜置例冊凡經取旨或堂白者每一事已命郎官畫時擬定長貳書之於冊以爲例每半年則上於尚書用印給下如此則前予決悉在有司之目得

吏無所措巧銓綜漸以平允詔從其言

善曰凌季文力爭和議其於國是辨之既明至於臨事當官卓有建樹所汰浮滯遂爲令甲功德之及人者溥矣列之政業夫誰曰不宜

俞烈字若晦臨安人烈少警敏淳熙八年試禮部第一十五年以太學錄轉對論浙西圍田爲運河及民田之害乞精選郎官與漕臣按視開復帝然之遷太常博士光宗卽位轉對乞酌咸平元祐之制日輪講讀官內直以備訪問又論三省批送文字文移回復爲胥史請求之資乞操縱伸縮權在朝

廷毋爲舊例束縛紹熙改元進國子博士慶元三年爲秘書郎年餘出守嘉興上供及額卽止恐貽後害不肯增緡錢以受最賞六年爲司封郎官尋充接送金國吊祭使除起居舍人又充報謝使嘉泰四年除秘書監尋除中書舍人論駁不撓永州祁陽縣舊有韓氏祖墓有鄰近於其墓禁內伐竹十五竿以蓋墓蓬法司先引律盜人墓木者杖一百繼以觀望侂冑嫌于太輕輒引持杖竊盜法烈駁奏忤侂冑論去家居五年嘉定初知慶元府鎮以清淨移知鎮江府時淮民流移充斥多方拯救

孩提棄擲募爲鞠養至春民思歸業厚爲津遣歲
旱河澁烈命車江水入裏河舟行無留權吏部侍
郎乞濬練湖通漕廣漑民田兼中書舍人未嘗懲
往事少屈勲戚濫恩貂璫佚罰官掖寅緣干請多
格不行尋無侍讀真除吏侍進讀通鑑至唐景龍
中斜封墨勅因言中宗不用太宗制度不由中書
審覆門下審讀人主當以爲戒又讀孝宗聖政至
郊祀不買象事拱而言淳熙以前郊祀必用象孝
宗超然遠覽以爲大禮初不係此喚回買象使臣
可謂達禮之本矣六年卒于官號盤隱居士有盤
隱詩編掖垣制草奏議北征等集

趙必愿字立夫居餘杭未弱冠丁大母憂哀毀骨立
服闋以大父汝愚遺表補承務郎開禧元年銓監
平江府糧料院調常熟永嘉定七年舉進士知崇
安縣剖判如流吏不能困修學政立催科法列戶
名爲三等以三期爲約足者旌之未足者寬以趣
之踰期不納者里胥程督之民皆感悅願輸革胥
吏鬻鹽之弊擅發光化社倉活饑民帥怒逮吏欲
懲之必愿曰芻牧職也吏何罪束擔俟譴帥無以
詰而止舊有均惠倉無所儲必愿捐緡錢增糴至

二千石力主義役之法鄉選善士任以推排入資
買田助役則免有產之家有感化者出已田以倡
遂徧行一邑上下便之臺府以聞下其式八郡四
十八縣役滿民共立祠刻石授湖廣總所幹辦公
事丁父憂居喪盡禮服除充兩浙運司主管文字
尋知全州改知常州又改知處州陳折帛納銀之
害皆得請移泉州兼知台州一循大父之政端平
元年以直秘閣知婺州遷太府丞尋遷度支郎中
兼右司郎中嘉熙元年貽書政府論邊防事宜授
左司郎中又論濟王及國本事遷左司郎中進司
農少卿拜司農卿改宗正少卿遷大府卿兼中書
門下檢正諸房公事遷戶部侍郎權戶部尚書忤
丞相史嵩之乞免官乞祠皆不許淳祐五年以華
文閣學士知福州卒贈銀青光祿大夫必愿平易
以近民忠信以厚俗惻怛以勤政才周器博心平
量廣而又蚤聞家庭忠孝之訓師友正大之言故
所立卓然可稱云

附志卷之七十四

萬曆杭州府志卷之七十五

人物九

先朝文苑
詞翰附

晉

范平字子安錢塘人研窮典墳淹貫百氏舉茂才歷
臨淮太守有異政累召不起卒謚文貞三子爽咸
泉並以文學知名泉子蔚爵關內侯家世好學有
書七千餘卷遠近來讀者嘗百餘人給以衣食蔚
子文才幼亦知名宋祀蔚於鄉賢祠

褚陶字季雅錢唐人弱不好弄少而聰慧以墳典自
娛年十三作鷗鳥水碓二賦見者竒之陶嘗謂所

親曰聖賢備在黃卷中舍此何求吳平召補尚書
郎張華見之謂陸機曰君兄弟龍躍雲津顧彥先
鳳鳴朝陽謂東南之寶已盡不意復見褚生機曰
公但未覩不鳴不躍者爾華曰故知延門之德不
孤川嶽之寶不匱矣仙至中尉卒迨宋時有褚含
褚遶皆其後裔

于寶字令升臨安人

一云新蔡人

祖統吳奮武將軍都亭

侯文瑩丹陽丞寶少勤學博覽書記以才器召爲
著作郎平杜弢有功賜爵關內侯中興草創未置
史官中書監王導疏薦寶於元帝于是始領國史

以家貧求補山陰令遷始安太守王導署爲司徒
右長史遷散騎常侍著晉紀自宣帝迄于愍帝五
十三年凡二十卷奏之其書簡潔直而能婉咸稱
良史性好陰陽術數留思京房夏侯勝等傳撰集
古今神祇靈異人物變化名搜神記凡二十卷以
示劉惔惔曰卿可謂鬼之董狐又爲左氏春秋左
氏義外傳註周易周官凡數十篇及雜文集行世
善曰寶興於永嘉太始之後時襲雕織菱弱不振
而能斷雕爲朴歸於雅醇遂成晉書備世典憲亦
一時良史才矣夫鬼神茫昧先聖所不道蓋反常

則近誣志怪則亦誕無益民聽徒惑見聞以是明者謹之如搜神記者不作可也

六朝齊

宋廣之字處深錢唐人喜清談初顧歡著三名論以正四本之失時賢並立論難而廣之獨爲精詣

六朝梁

戚袞字公文鹽官人少游學都下受三禮于助教劉文紹年十九梁武帝制策孔子正言并周禮禮記義袞敷對無遺擢高第除揚州祭酒從事兼太學博士齊帝時博士宋懷芳號儒宗自魏勞儀禮禮記疏秘之將亡謂家人曰吾死後戚生若至即以遺之如其不來隨屍而殯其爲儒者推許如此簡文在東宮召袞及諸儒講論次令中庶子徐摛質難詞辯從橫諸儒懾凜袞精采自若剖答如流

六朝陳

顧越字允南鹽官縣人所居新坂黃岡世有鄉校祖道望齊散騎侍郎父仲成梁護軍司馬豫章王府諮議叅軍家傳儒學並專門教授越少孤勤苦自立勵精學業不舍晝夜遂博通羣籍咸盡其精微時太子詹事周捨一見歎賞越初仕梁爲南平王

偉右常侍徧綜經義深明毛詩傍通異義善莊老
 尤長論難兼工綴文闢尺牘長七尺三寸美頰眉
 除五經博士侍宣城王講授陟普安王府諮議參
 軍領國子博士歸隱于武丘山召為國子博士陳
 天嘉中詔侍東宮講除東中郎鄱陽王府諮議參
 軍尋領羽林監遷給事中黃門侍郎國子博士待
 讀如故時朝廷草創疑義多所取決以太子仁劬
 宣帝有奪宗之兆疏言宜慎輔弼之選廢帝即位
 拜散騎常侍兼中書舍人黃門侍郎如故領天保
 博士掌儀禮宣帝輔政越囚請假免官卒年七十
 七所著喪服毛詩老子孝經論語等義疏四十餘
 卷詩頌碑製牋表凡二百餘篇

全緩錢唐人幼受學于博士褚仲都篤志研玩得其
 精微梁太清初歷王國侍郎國子助教兼司議郎
 專講詩易入陳累遷紹興王府咨議參軍

杜之偉字子大錢唐人家世以三禮專門父規梁奉
 朝請與濟陽江革會稽孔休源友善之偉少精敏
 有逸才七歲受尚書十五徧觀文史及儀禮故事
 時輩稱其早成侯景叛逃竄山澤及陳高祖為丞
 相召補記室參軍遷中書侍郎領大著作高祖受

禪除鴻臚卿太中大夫仍勅撰梁史永定三年卒
贈通直郎散騎常侍時年五十二之偉以強識俊
才有名當世爲文不尚浮華而溫雅博瞻

隋

顧彪字仲文餘杭縣人明尚書春秋煬帝大業時爲
秘書學士撰古文尚書義疏二十卷行于世

魯仲達字世達餘杭人煬帝大業時爲國子助教撰
毛詩章句義疏四十二卷行于世

唐

褚亮字希明錢塘人博觀圖史經目不忘年十八詣

陳僕射徐陵陵與語異之後主召見使賦詩江總
諸詞人在席皆服其工累遷尚書殿中侍郎入隋
爲東宮學士遷太常博士煬帝議改宗廟之制亮
請依古七廟而太祖高祖各一殿法周文武二祧
與始祖而三餘則分室而祭始祖二祧不從迭毀
未及行坐與楊玄感善煬帝矜已嫉才因是亦貶
西海司戶時博士潘徽貶威定王簿亮與俱至隴
山徽死爲歛瘞人皆義之後爲薛舉黃門侍郎舉
滅秦王謂曰寡人受命而來嘉於得賢公久事無
道君得無勞乎亮頓首曰舉不知天命抗王師今

十萬衆兵加其頸大王釋不誅豈獨亮蒙更生邪
王悅賜乘馬帛三百段卽授王府文學唐高祖親
格虎亮懇幅致諫帝禮納其言王每征伐亮在軍
中嘗預秘謀有裨輔之益卒年八十八贈太常卿
陪葬昭陵謚曰康初太宗作文學館以亮與杜如
晦等十八人並爲學士命闢立本圖像亮贊之號
十八學士天下慕向謂之登瀛洲子遂良

準字宗一富春人以孝友聞工文詞著後漢春秋
二十餘萬言又著六經解罔人文集未就爲人有
謀畧尚氣節年二十以書干丞相擢崇文館校書

郎又以金吾兵曹爲邠寧節度掌書記涇源之亂
以謀畫佐元戎有大功累遷殿中侍御史浙東廉
訪使判官拊循疲人按驗汙吏吏民敬愛召爲翰
林學士遂爲尚書山本官叅度支調發出納有方
出爲和州刺史降連州司馬率所著有邠志二卷
孫彊富春人因顧野王王篇增字 上三十卷爲大廣
益會玉大槩本說文云

羅隱貫具名宦傳性傲睨嫺于詩詞博物多智好譏
評人物舉進士不第病卧長安屬旱詔祈雨非法
隱上疏諫其詞婉轉規諷後從事湘南歷淮潤不

得意歸謁錢鏐表爲錢塘令遷著作郎後爲鎮海
軍節度掌書記諫議大夫給事中賜金紫卒隱爲
詞章有氣力工於詩與同姓虬鄴齊名時號三羅
舊鼉江常有二氣夜亘天及隱與杜建徽生氣不
復見識者以爲文武秀氣鍾焉隱著湘南甲乙集
淮海寓言及讒書六十一篇行于世子塞翁爲鎮
海軍節度推官隱嘗居池之梅根浦故又號江東
生
善曰羅昭諫詩詞清婉語多刺譏求諸兩漢其滑
稽之流乎然隱乃心王室勸鏐討梁有不忘宗國
之心焉予故係隱於唐以旌其忠

宋

盧禎字叔微杭州人自幼穎悟及長曉五經大義酷
嗜周易孟子端拱初登進士第調補真定東廉主
簿未及赴官卒年二十七嘗著五帝皇極志孺子
問翼善書數十篇

楊大雅字子正錢塘人十歲作雪賦長日誦書數萬
言端拱二年乙科登第咸平三年交趾獻犀大雅
獻犀賦召試學士院明年上書獻所爲文二十餘
萬言乃直集賢院歷二十七年不遷仕終集賢院

學士出知亳州卒所著有大隱集職林兩漢博聞
若干卷大雅幼孤自立勤苦爲文躬儉約不妄進
取人知其爲有德君子子洎濬永漸沆瀆六人
吳銳餘杭人登進士重定切韻進于朝後爲屯田郎
中史館校勘與丘雍校勘王篇時稱無舛誤云
沈括字存中錢塘人博覽古今於書無不通舉進士
爲揚州司理編校昭文館書籍累遷翰林學士神
宗嘗欲籍民車備虜括言古人所謂輕車者兵車
也今民間輜車重大椎樸恐兵間不可用遂罷括
以文學著嘗上熙寧奉元曆編修天下郡國圖所
著有春秋機括筆談長興集行世括於進爲叔而
少於進併遼世所謂三沈者也

吳天秩字平甫杭人幼聰悟勤苦該洽學者多從焉
資復恬退不嗜榮利杜門著書粹茹自適者幾二
十年後薦補太廟齋郎不赴授大庾尉辭再調浮
梁尉到官逾年歿有文集五十卷

卷

趙子直於潛人嘉定間進士紹定五年仕爲某郡教
授撰桐汭新志二十卷

葉時字秀發仁和人操履端凝累官至龍圖閣學士
卒謚文康所著有禮經會元竹埜集行世因自號
竹埜乃以名集

凌緯字景文昌化人篤學能文大德中以才薦為雪
江書院山長尋棄去年九十三卒邑令表之曰康
德先生所著有唐山紀事等書已上俱
文苑

隋

許善心字務本蓋新城人善心幼聰明有思理家有
書萬卷皆徧通涉舉秀才對策高第授度支郎中
陳在隋文帝授以散騎常侍賜衣一襲善心哭盡

哀拜於殿下悲不能與上顧左右曰我平陳國惟
獲此人既能懷其舊君即是我誠臣也勅以舊官
直門下省時有神雀集含章閣善心即作頌奏之
文帝大悅除秘書丞大業中轉禮部侍郎字文化
及弒煬帝于江都稱帝改元群臣盡詣朝堂謁賀
善心獨不往化及執而殺之子敬宗曾孫遠按成
化志

或曰善心乃河南之新城非杭之新城也或曰以
善心子敬宗奸邪悞國故黜之恐其辱吾土也夫
河南無新城亦未可為準也攷唐書善心本傳實
取之公後說亦未可為準也攷唐書善心本傳實
高陽比新城人今直隸保定府屬縣也惟此最為
足據第以舊志既收即漸通志亦不削去故存以
俾疑而姑識
其說如此

唐

顧况字通翁鹽官人白居易微時以刺况况戲曰
京師米貴居大不易及見原上草詩曰野火燒不
盡春風吹又生日有句如此居亦何難

宋

錢昆字裕之侔子也登進士第累遷至三司度支
判官歷知七州治尚寬簡以秘書監致仕卒年七
十六昆善為詩賦又善草隸有文集十卷

錢易字希白年十七舉進士御試三題日中而就有
司以其輕俊黜之然自此以才藻知名太宗語蘇
易簡曰朕恨不與李白同時易簡曰今進士錢易
為歌詩殆不下白欲用唐故事召至禁林不果咸
平二年再舉進士甲科為光祿寺丞景德中舉賢
良方正科策入等擢至翰林學士卒易才思敏贍
數千百言援筆立就真宗封泰山獻殊祥錄祀汾
陰命修車駕所過圖經獻宋雅一篇易歌詩有義
山長吉體而俊逸過之又善行草書有集一百六
十卷青雲總錄一百卷洞微志十卷

沈遼字睿達錢塘人邁弟也少好學傲睨一世讀左
氏班固書少摹倣之輒近似乃鋤植縱舍自成一

家長於詩歌尤工翰墨王安石曾布皆學其筆法
安石得其清勁布得其真楷趣操高爽飄飄然有
物外意絕不喜進取登第後游京師偶爲人書裙
帶內侍買入禁中神宗初嗣位厲精求治見之不
悅會遣使察訪兩浙就以諭之時遼爲吳縣令遂
遭劾安石救之不能釋乃坐削籍後卜居池陽築
室曰雲巢好事者多往游焉遼追悔平生不自貴
重悉謝棄少習杜門隱几間作爲文章雄偉綺練
曾鞏蘇軾黃庭堅皆與唱酬然竟不復起元豐末
卒所著有雲巢編

楊蟠字公濟章安人貫杭州登慶曆六年第嘗作錢
塘百詠詩歐陽修讀其集有詩云蘇梅久作黃泉
客我亦今爲白髮翁卧讀楊蟠一千首乞渠秋月
與春風王安石有答蟠書曰讀足下之文但知畏
之願造請所聞蘇軾守杭蟠丞郡與軾倡酬平生
爲詩數千篇後知壽州提點荆廣鑄錢卒

周邦彥字美成錢塘人踈曠少檢不爲州里推重而
博涉百家言元豐初游京師獻汴都賦萬餘言神
宗異之命侍臣讀於延英殿間召赴政事堂自諸
生一命爲太學正居五歲不遷益盡力於詞章出

教廬州知深水縣遷為國子主簿哲宗召對使誦
 前賦除秘書正字歷校書郎考功員外郎兼議禮
 局檢討官至徽猷閣待制出知順昌府工文章妙
 音律其樂府盛行于世為人落魄不羈自號清真
 居士有清真集二十四卷

葉廣居字居仲仁和人天資超邁才力絕人古文詩
 歌出人意表仕至江浙儒學副提舉

元

周密字公謹錢塘人宋寶祐間為義烏令入元不仕
 詩極典雅善畫得意輒自題其上所著有齊東野

語癸羊雜誌

金應桂字一之號蓀壁錢塘人能詞章宋季為縣令

入元隱居風管書學歐陽詢畫學李龍眠築蓀

壁山房左弦右壺中設圖史古器客至撫玩清談

纏纏不休每肩輿入城幅巾氅衣望之若神僊云

馮士願富春人贈集賢修撰驥子也個儻有大志能

文章作詩風格清峻與吳見心黃子久並負才名

吳復字見心富春人少落拓不羈中歲折節讀書晚

好游聞有名士不憚千里求見見聞益博善樂府

歌詩高處逼盛唐與會稽張憲齊名所著有雲槎

集十卷

盧浩錢塘人好古博學其爲詩如不經心天然超詣
流輩罕及

崔彥輝錢塘人號雲林生與王蒙俱吳興趙氏甥善
篆隸詞賦畫亦超詣隱居賣藥鹽橋市

葉森字景修錢塘人早從貞白先生吾子行游古文
歌詩咸有法則一時所與交者如王真人眉叟薛
真人玄曦張外史伯雨張承旨仲舉唱酬極富所
著有瓦釜鳴集

錢子廷王錢塘人博綜經史詩文一主於理紫陽
方回劉辰翁稱其詩逼陶韋書逼顏柳仕至江浙
儒學副提舉所著有湛困集

錢惟善字思復錢塘人至正辛卯舉于浙省其所試
羅刹江賦爲世所稱官至儒學副提舉所著有文
集若干卷

仇遠字仁近錢塘人元初爲溧陽州儒學教授工詩
文一時游其門者若張雨張翥莫維賢皆有名當
時所著有山村集批註唐百家詩選

盛明叟昌化人以文學名築蒙齋讀書因以自號工
文詞所著有凍蠅說雪賦蕨薇子傳爲士大夫所

稱仕終甌寧縣丞

莫維賢字景行錢塘人好學能詩雅尚標致築別業於靈隱天竺間逃屋栽杏號曰杏園日與騷人墨客游咏其中列二十一題時人比之輞川所著有廣莫子稿

梁建中錢塘人早嗜伊洛之學復有志於文辭下筆滔滔數百言皆典雅成一家之言一時士夫皆稱譽之金華宋濂序其文集濂門人稱建中尅苦在學老而不倦可以知其取友矣

善曰宋元文詞若錢希白之瞻敏沈存中之典麗周美成之穠郁仇仁近之清遠皆擅聲文林揚芬藝圃庶幾陽阿薤露焉匪是則問巷之謳吟耳俱詞翰

萬曆杭州府志卷之七十五終

萬曆杭州府志卷之七十六

人物十

先朝官蹟
隱逸附

漢

諸葛琮餘杭人後漢時為河間太守以賢德稱

孫瑜字仲異父靜字幼臺堅季弟也靜戀墳墓宗族

不樂出仕終于家五子昂瑜皎真謙瑜始以恭義

校尉領兵嘗賓客諸將多江西人瑜虚心綏拊得

其懽心建安九年領丹陽太守為衆所附至萬餘

人加綏遠將軍遷奮威將軍領郡如故自溧陽徙

屯牛渚瑜以永安人饒助為襄安長無錫人顏連

爲居巢長使二府將吏子弟就受業遂立學官臨饗講肄是時諸將皆以軍務爲事而瑜好樂墳典雖在軍旅誦聲不絕建安二十年卒

三國吳

郭成字元禮富春人夙著義節漢末羣雄競逐遂乘舟泛五湖遊滄江探幽逐勝書劍自娛吳拜武義校尉遷黃門侍郎封永興富春二縣侯後裔多英髦云

褚泰仕吳封臨平侯自幼仁厚政寬刑簡惠澤及民後居錢唐爲郡著姓歷六朝至唐代有顯者

丁諤錢唐人時方尚門閥而諤地族寒微與陽羨張秉烏程吳粲雲陽殷禮並有時名顧劭拔而友之爲立聲譽以並陸全之列仕吳至典軍中郎將善曰取士以世閥此漢魏陋習諤不遇顧劭將陸沉以終世矣蟠木朽株借資先容豈不然乎

唐

褚珍字伯玉遂良之曾孫擢進士第累拜監察御史裏行先天中突厥圍北庭詔珍持節監督諸將破之遷侍御史拜禮部員外郎氣象凝挺不減在臺五代

馬綽餘杭縣人性最淳直初與錢鏐俱事董昌昌使鏐閱部伍亡其名籍鏐因歷唱之存亡健悴者皆無遺失綽密謂鏐曰老子忌猜駭公強記當必相啗乃以白紙數番授鏐若代軍籍者鏐由是深德之因以其妹歸綽綽尋隨董昌於越州昌僭號綽棄家先奔于鏐乃授諸城都指揮使徐綰之叛綽有發番門之功鏐尋命元瓘納綽女是爲恭順夫人綽累職鎮東軍節度副使兩浙行軍司馬睦州刺史奏授雄武軍節度使同平章事卒

崔仁冀字子遷錢塘人少篤學有文采事錢俶爲通儒院學士俶罷沈子虎政事以仁冀代之總其兵要太祖嘗諭旨於俶曰元帥克毘陵有大功可暫來與朕相見仁冀告俶曰主上英武所向無敵保族全名上策也俶然之太宗時俶與仁冀決策納土上以仁冀爲淮南節度使俶薦其才擢衛尉卿判大理寺移知撫州卒

善曰崔子遷佐吳越無殊績顯效然能知機達時決策東向明帝王之分識順逆之義優於王元之勸隗囂者矣

曹仲達圭之子生于臨平室有紫光少小圭嘗節其

飲食雖嚴冬尚未挾纊品膳悉與僕隸等又日令
運甕圭在姑蘇與仲達求婚于睦州陳詢及將親
迎途由杭城錢鏐見而竒之以妹儷焉累授台處
二州刺史元瓘襲封命仲達權知政事國建拜丞
相佐嗣元瓘仲達復攝政事皆大賚諸軍軍中有
言不均者輒大譟舉仗不受賜諸將不能制仲達
諭之皆釋仗致拜仲達性仁厚好施食不兼味元
瓘重之常呼丞相而不名卒謚安成

德昭字明遠本姓危父仔倡刺信州奔吳越錢鏐
易今姓仔倡嘗命日者視諸子日者指德昭

獨此子非武官及學文其師曰爾才可以爲王侯
因授以文體元瓘襲國教令之任頗闕林鼎薦之
元瓘與語謂鼎曰德昭有輔弼之才吾子孫無憂
矣遂掌文翰後事佐晉開運三年用師南閩兵機
細務悉以委之尋拜國相因相俶周顯德二年用
師毘陵吳程執趙仁澤送錢塘德昭憐其忠力救
免死六年嘗與吳延福俱入貢于周至乾德五年
以吳越丞相卒贈太保德昭治家以孝友聞

宋

錢億元瓘之子俶之弟字延世歷事佐俶佐議鑄錢

錢以益將士祿賜億諫有八害其言鑿鑿可行判明州有善政凡科率舊制悉除之疏諫俶指民丁以益軍旅嘗應和俶作民勞逸由君奢儉詩億和篇因陳諷刺性俊拔善屬文建隆初奏授奉國節度卒年二十九謚忠憲

錢惟演俶之子字希聖幼有俊才俶嘗使賦遠山詩有高爲天一柱秀作海三峯之句咸平中獻其所爲文拜太僕寺卿擢知制誥翰林學士拜樞密副使加尚書右丞轉工部尚書進兵部樞密使除大軍節度使知河南請覲加同平章事判許州改鎮

武勝又徙秦寧上耕籍入侍祠爲景靈宮使判河南改鎮崇信卒贈侍中惟演少富貴能志於學有文章與楊億劉子儀齊名嘗曰學士備顧問不可不該博故其家聚書侷於祕府又多藏古書畫在館閣與脩冊府元龜凡千篇詔楊億分爲之所著有典懿集樞庭擢髦前後集伊川漢上集金坡遺事錄飛白書叙錄逢辰錄奉藩書事謚文僖

錢明逸字子飛舉才識兼茂科父子二人皆中制科世以爲盛累官翰林學士卒贈禮部尚書謚脩懿唐拱其先世自晉昌徙餘杭有唐山令者曰熊生希

顏唐天復中以明經為建威推官希顏生仁恭仕吳越仁恭生渭仕宋為職方郎中渭生拱以父蔭補太廟齋郎改三班借職再遷右班殿直為漳州監押卒贈太子太師拱孝弟於家信義于友廉遜於鄉里居官則名公鉅人皆以為才子介為言官以直聲聞天下別有傳

盛京餘杭人豫之子咸平元年進士第康定初為諫議大夫出守江寧以老乞便郡詔移海州天資仁厚不忍以法繩下吏民化服無有欺者在官民愛既去民思仕終工部侍郎後十年子遵甫以光祿

守丞通判海州歲旱發公私藏粟以廩民全活甚衆又設方畧捕奸盜發輒得又四十餘年遵甫之子仲孫以朝奉大夫守海州恭年大治邦人有盛使君家兒世世循吏之稱

善曰昔河東柳氏以政業訓其子孫而世嗣多賢增光趾美遂為名家貽謀之當慎如是哉盛氏自太傅肇基侍郎奕美已而遵甫仲孫紹休不替濟濟數世官業相承實茗川之華胄也豈徒衣冠接武已耶

元奉宗字知禮德昭之孫景德二年甲科及第知通

州海門縣地苦斥鹵奉宗爲鑿池注甘泉人甚利
之遷博士拜屯田員外郎告老歸杭奉宗天性恬
靜舊地在闌閘乃謂家人曰富春佳山水真吾退
閑之所遂卜居焉景祐戊寅冬卒其後有絳

關魯錢塘人大中祥符五年以進士起家盡力于官
歷守池台二州爲尚書郎年八十歸老錢塘陳襄
爲作鴻飛之詩謂其能以禮致仕而老成之德不
衰請養于朝天子不能用以皇祐四年卒八子皆
學行修立以進士舉者六人景仁尤著

唐肅字叔元錢塘人七歲以能誦五經知名與孫何

丁謂曹商游世謂之孫丁曹唐肅爲人清直廉儉
恬於榮進咸平初登進士第爲秦州司理有人夜
宿逆旅而同宿者殺人亡去旦起視之血汚其衣
爲吏所執不能明遂自誣服肅爲白其寃而知州
事馬知節趣具獄肅固持不可後數日果得殺人
者就辟擢本州觀察推官遷著作郎知洪州艤舟
南康或問其故曰職田以四月爲限今遽往得無
趨利乎踰月乃上仕至龍圖閣待制天聖八年卒
錢象先字資元杭人一云蘇人進士高第呂夷簡薦爲國
子監直講歷權大理少卿度支判官河北江東轉

運使召兼天章閣侍講加龍圖閣直學士出知蔡州象先長於經術侍邇英十餘年有所顧問必依經以對反復諷諭遂及當世之務帝禮遇甚渥故事講讀官分日送進象先已得蔡帝猶諭之曰大夫行有日矣宜講徹一編徙知河南府陳州復兼侍講知審官院持心平恕旁通法家說條今多所詳定復知許潁陳三州以吏部侍郎致仕卒

郎簡字叔廉臨安人幼貧借書誦讀進上及第補試秘書省校書郎知寧國縣徙福清縣邑人爲立生祠調隨州推官及引對在具宗謂曰夷簡曰簡歷官

寡過而無一人薦之是必恬于進者特改秘書省著作郎知分宜縣徙知竇州藤州興學養士一變藤俗累遷尚書工部侍郎致仕祀明堂遷刑部卒特贈吏部侍郎簡性和易喜賓客卽錢塘城北治園廬自號武林居士導引服餌晚歲顏如丹幼從學四明朱頔旣長學文於沈天錫及仕分俸資之後二入亡又訪其子孫爲主婚嫁平居宴語惟以宣上德救民患爲意子亦爲尚書都官員外郎

錢暄字載陽惟演之子任郎官知開撫台三州有治績除少府監又知鄧州爲三司鹽鐵副使時勾考

諸路逋租兩浙轉運使當坐負暄因對從容爲言
逋租不入以頻年饑故今使者被罪必亟歛恐民
不堪惟稍寬乃可集得免出知鄆州除寶文閣待
制卒暄素好學皇祐中撰後漢功臣年表藏之秘
閣所至不爲赫赫名而旣去見思十二子內景璠
封康國公尚仁宗女許國大長公主生榮國公忱
忱生叅政端禮端禮孫左丞相象祖

善曰錢氏以國內附其子孫當爲國賓然彥遠及
暄旣以聲績著暄子景璠諸孫端禮象祖皆以名
顯後先相望數世昌熾豈分王之氣尚未盡歟
何錢氏之多賢也

謝景初字師厚絳之子慶曆六年甲科及第以大理
評事知越州餘姚縣始作海塘防水患民賴以安
累遷益州路提點刑獄以屯田郎致仕性倜儻勁
峭博學能文尤長於詩子壻黃庭堅以詩名家庭
堅自謂本從謝公得句法

謝景温字師直景初之弟方總角錢惟演見之曰此
兒舉措不凡若非龍駒當是鳳雛後必上隣伊周
旁叶房杜當作黑頭公矣後起縣令終刑部尚書
博學洽聞歷仕四朝爲時吏師

韋驥字子駿錢塘人生而警敏年十七以文謁王安石石安石甚稱覺之每一賦成學者傳誦既登進士累官利州路運判移福建路年饑議請賑貸驥以去京師遠不及上書待報乃檄州縣發廩而請逮違法之罪于朝聞盜阻險爲州縣患吏畏快爭言招納驥曰是爲民稔患因處畫斬捕方畧成就捕部內肅然召爲主客郎中出爲夔州路司憲知明州提舉洞霄宮卒驥樂易靜退孝友廉平文章藻麗其政事亦有聞所著有韋先生集二十卷賦二十卷

虞策字經臣錢塘人登進士調台州推官知烏程縣通判蘄州通判蔣之奇以江淮發運上計神宗訪東南人才以策對王安石禮李常繼薦之擢提舉利州路常平湖南轉運判官元祐五年召爲監察御史進右正言數上書論事謂人主納諫乃有福治道以清靜爲本西夏未順命策言今邊備解弛戎備不修古之人善鎮靜者警備甚密務持重者謀在其中未有鹵莽踈闊而曰吾鎮靜吾持重者又乞詔在內省曹寺監在外監司守令各得以其職陳朝政闕失百姓疾苦星文有變乞順天愛民警

戒萬事思治心修身之道勿以宴安爲樂哲宗納
后上正始要言遷左司諫曾肇以議北郊事與朝
論不合免禮部侍郎爲徐州策耑權給事中還其
命以爲肇禮官也不當以議禮得罪不從帝親政
條所當先者五十六事後多施行遷侍御史起居
郎給事中以龍圖閣待制知青州改杭州過闕留
爲戶部侍郎歷刑部戶部尚書拜樞密直學士知
未興軍成都府入爲吏部尚書奏疏徽宗請均節
財用屬疾祈外加龍圖閣學士知潤州卒于道贈
左正議大夫策在元祐紹聖時皆居言職雖不依
人進取亦頗持兩端故黨議之興已獨得免

善曰虞經臣言事侃侃有蓋臣之風其封還曾肇
制書可謂知自守者乃徘徊持兩端規免黨籍視
皇甫度遼何如哉嗟乎士君子不以義自信卽貴
窮人爵祗爲身累耳

沈晦字元朗錢塘人翰林學士邁之孫博覽強記善
綴文宣和元年第一人及第除校書郎未幾以著
作佐郎隨肅王使虜頗歷艱苦高宗卽位除集賢
殿修撰知信州將召爲中書舍人侍御史張守論
晦布衣時事帝曰頃在金營見其慷慨士人細行

豈足爲終身累邪進徽猷閣待制尋論罷紹興四年韓世忠張浚方用兵而晦不爲世忠所樂尋提舉臨安洞霄宮起爲廣西經畧兼知清江府晦設方畧使南州蠻酋莫子晟不復犯邊歲買馬三千疋繼者皆不能及進徽猷閣直學士晦膽氣過人不能動循法度貧時尤甚故多物議然其當官才具亦不可掩云

綱注字子東景仁子世爲錢塘人登紹興五年進士第嘗教授湖州與胡瑗之孫滌裒瑗遺書得易解中庸義藏之學官又錄瑗言行爲一帙意在美風俗新人材仕至太學博士卒自號香巖居士有關博士集二十卷行于世

黃黼貫在名宦傳少游太學第進士累遷太常博士輪對言周以輔翼之臣出任方伯漢以牧守之最擢拜公卿唐不歷邊任不拜宰相本朝不爲三司等屬不除清望官仁宗時韓琦范仲淹龐籍皆嘗經畧西事久歷邊任始除執政邊奏復警范仲淹至再請行具州之變文彥博親自討賊乞於時望近臣中擇才畧謀慮可以任重致遠者或畀上流或委方面習知邊防利害地形險阨中外軍民亦

乎其恩信熟其威名天下無事則取風績顯著者
不次除拜以尊朝廷邊鄙有警則任以重寄俾制
方面出將入相何所不可上嘉獎曰如卿言可謂
盡用人之道進秘書郎尋除直秘閣兩浙路轉運
判官浙東旱澇黼上疏懇加賑濟全活甚衆語亦
具名宦傳中除中書門下檢正諸房公事守殿中
侍御史兼侍講行起居郎兼權刑部侍郎以劉德
秀論劾奉祠卒

善曰仕人樂清華而厭冗劇授任者亦多徇之然
非內外兼重之誼也黼所奏深燭其弊知言哉

俞灝字商卿世居杭登紹熙四年進士第仕淮東官
撫丘密令其佐畢再遇救山陽灝料虜必窺采石
請回軍石梁河以遏其鋒虜擣虛不入而遁再遇
知揚州盪平江湖多灝計畫再遇欲誅脅從者救
活甚衆開禧議開邊政府密引灝畫計灝言輕脫
寡謀之人不可信趙良嗣張覺往轍可鑒歷秉旄
節皆有聲寶慶二年致仕築室九里松買舟西湖
會意處竟日忘返以詩詞自適號青松居士有集
趙善湘字清臣濮安懿王裔居餘杭慶元初進士以
近屬轉秉義郎調金壇縣丞五年知餘姚縣開禧

元年通判婺州嘉定元年平茶寇功判無爲軍兼
淮南轉運判官淮西提點刑獄累遷大守正丞兼
權戶部郎官改知秘閣進直徽猷閣兼知廬州十
三年進直寶文閣以平固始寇功賜金帶十四年
進直龍圖閣知鎮江府十七年拜大理少卿進右
文殿修撰封祥符縣男寶慶二年進集賢院修撰
兼大理卿權刑部侍郎進寶章閣待制進封子紹
定三年進煥章閣直學士進封伯以李全犯淮東
進煥文閣學士江淮制置使乃命專討四年進封
侯加食邑及戮全進兵部尚書五年復泰州淮安

州鹽城淮陰縣四城進端明殿學士以受金樞密
副使納合買任降復盱眙軍泗壽二州功進資政
殿學士賜手詔金器等物九疏乞歸皆不許請愈
力進大學士提舉洞霄宮封天水郡公嘉熙二年
授四川宣撫使兼知成都府未拜改沿海制置使
兼知慶元府卽乞祠改知紹興府兼浙東安撫使
三年兩請休致四乞歸田復提舉洞霄宮淳祐二
年帝手詔求所解春秋進觀文殿學士致仕卒贈
少師所著有周易約說八卷周易或問四卷周易
續問八卷周易指要四卷學易補過六卷洪範統

論一卷中庸約說一卷大學解十卷論語大意十卷孟子解十四卷老子解十卷春秋三傳通議三十卷詩詞雜著三十五卷

趙與清臨安人宋宗室開禧間爲浮梁令爲政以人才爲先講學興禮士風翕然

章樵字升道昌化人嘉定元年進士歷海州高郵山陽教官習知海徼事再上時相書力陳李全必叛劉瑋不可任重後全果亂郡縣官多被禍樵率諸生盛服坐堂上講誦賊至斂刃而退擢宰吳判常州皆以廉著御史洪咨夔舉擢監登聞鼓院尋以疾乞歸授知處州樵學宗伊洛所著有集曾子十八篇章氏家訓七卷補註董仲舒春秋繁露十八卷古文苑二十卷行世子淳以太學生授淮東總領所幹辦官孫祖康温州永嘉簿調監平江府贍軍酒咸有治能廉操稱象賢云

章鑑字君寶昌化人嘉定癸未進士初授永嘉簿通判吉州丁內艱服除召爲直講歷將作少監轉太常丞出知衢州以太常丞召爲資善堂講官遷國子司業兼修國史侍讀進太府卿以言免提舉玉局觀端平更化鑑首上封事復召入資善堂凡爲

講官者六年兼掌內外制時相專政鑑極論其蠹
 國且乞罷職遷兵部侍郎兼給事中華文閣待制
 累階通奉大夫錢塘縣開國伯食邑八百戶卒贈
 光祿大夫鑑天資穎敏忠直淳厚事有切於時者
 必為上極言之時相疾其正論每怵以禍福鑑不
 為動深為理宗所親禮自號藝翁所著友山文集
 十卷奏議十卷內外制資善講讀若干卷四時雜
 興衆芳集各一卷

章鑄昌化人鑑之弟嘉定庚辰進士淳祐間以朝議
 大夫將作監丞知信州興學校作浮橋諸廢無不

補葺又嘗考古今作饒志仕至福建路轉運使

遷吏部郎官積階中奉大夫爵昌化縣開國男食
 邑三百戶從弟鏞亦有時名

趙彥呐字敏若宋宗室居餘杭類試得第嘉定十二

年西和州新被兵制使安丙檄經畧邊關金人再
 至戰却之因請修州北水關募民畊戰以守又勸
 丙盡捐關外四州租結民兵使各自為守皆不行
 在州五年得軍民心轉提點刑獄尋帥沔寶慶元
 年移帥興元三年合寶鄭損棄四州退保三關彥呐
 力爭不勝罷歸家者五年紹定四年桂如淵代損

起彥呐爲副使端平元年陞正使丞相鄭清之趣
其出兵以應入洛之役不從秦鞏豪右汪世顯久
求內附至是彥呐爲力請數四清之亦訖不從三
年金人大入至三泉彥呐大敗貶衡州史嵩之留
之江陵卒

洪勳字伯魯容夔長子以鎮廳登淳祐四年進士第
少爲崔與之魏了翁所知仕至兵部尚書嘗爲詞
臣發明先皇與子之意人稱其有父氣骨贈端明
殿學士謚文靖弟熹燾亦與勳齊名皆能紹其家
學

崔光彌仁和人度宗時爲博士文學敏贍行已高明
爲時所重又崔育林與光彌同邑才識高邁文思
淵博官至職方員外郎

元

葉李字太白苗春縣人少有奇質補京學生景定五
年與同舍生八十三人伏闕上書攻賈似道竄漳
州似道旣敗乃得自便會宋亡歸隱富春山辟署
蘇杭常郡教授俱不應至元十四年世祖命御史
大夫相威行臺江南且求遺逸以李姓名上初李
攻似道其書末有前年之師適有天幸克成厥勳

之語世祖習聞之每拊掌稱歎及是其姓名聞世祖大悅卽授奉訓大夫浙西道儒學提舉李聞命欲遁去而使致丞相安童書有云先生在宋以忠言讜論著稱簡在帝心今授以五品秩士君子當隱見隨時其尚悉心以報殊遇李乃幡然拜命二十三年侍御史奉命搜賢江南世祖面諭之曰此行必致葉李來李既至京師帝召見曰卿鄉時訟似道書朕嘗識之更詢以治道李歷陳古帝王成敗之由世祖首肯賜坐錫宴每罷朝必召見論事二十四年特拜御史中丞兼商議中書省事李

固辭會尚書省立授資善大夫尚書左丞李復固辭時帝欲徙江南宋宗室及大姓於北方李乘間言宋已歸命其民安於田里今無故聞徙必將疑懼萬一有奸人乘釁而起非國之利也帝大悟事遂寢帝欲伐交趾召李入議李曰遐方遠夷得之無益軍旅一興糜費鉅萬萬一蹉跌非所以威示遠人也乃止二十五年陞平章政事李固辭許之賜玉帶視秩一品及平江田四千畝桑哥爲尚書丞相專擅國政急於財賦毒及生民李與之共事莫能匡正辭疾南還揚州儒學正李滄言皇帝聖

明更張政化人皆知桑哥用群小之罪而不知葉李舉桑哥之罪宜斬李以謝天下帝矍然曰葉李廉介剛直朕所素知者寧有是邪二十九年俾爲平章政事上表力辭未幾年五十一而卒帝嘗問兵部郎中趙孟頫李與留夢炎孰優孟頫優夢炎帝笑曰夢炎以掄魁位宰相而附賈似道病民誤國伴食中書無所可否李舊由諸生力詆似道其過夢炎甚遠然其性剛直人莫能容而朕獨愛之也李前後被賜之物甚多而自奉甚儉嘗戒其子曰吾世業儒甘貧約惟以忠義結主知汝曹其清慎自持勿增吾過指所賜物曰此終當還官比卒悉表送官一毫不自私至正八年贈資德大夫江浙等處行中書省右丞上護軍追封南陽郡公謚文簡

善曰葉文簡謹言於宋而復臣事勝國其事與許善心同遇知世祖致位台司雖不能大有建明而疏止江南宗室北徙及免租稅二事爲得大臣體且能不私賜物以正自終何其介也大節一虧清議交謫爲士君子者可不重以爲戒乎

章沅一名元佐字舜臣昌化人至正中爲本邑尹詳

見名宦

孫德潤字以誠錢塘人由江浙行省掾史仕為處州松陽令先是縣籍失實力役無稽民困于徭役適郡符下縣德潤欣然力行計畝均役之法于是以方田履其頃畝以土會等其硯沃以出貢賦任徭役籍既具適南北多事征歛旁午縣惟按籍征之民大悅錄其事刻于石

凌德字信翁杭人至元間以懷遠大將軍為處州路總管連年值旱德乃露頂跣足行列日中祈雨每禱輒應有以詩頌之者曰雨向心中得雲從脚下

生郡人愛戴之如父母

官蹟

漢

張儼餘杭人好學有賢德不樂榮利種瓠自給

陸瑋字文該錢唐人後漢時納祿隱居於靈隱山

六朝齊

顧歡字景怡鹽官縣人年六十七歲時父使驅田中雀歡因作黃雀賦而歸雀食稻過半貧無以受業倚聽隣人讀書無遺忘者其隱德孝行具見事紀有文義三十卷行世

沈麟士字雲禎吳興武康人少好學家貧織簾誦書

杭州府志 卷之二十一 人物 三十一
兄子少孤麟士撫養之屢辭辟召隱居餘杭吳差
山講經教授從學者數十百人麟士有書數千卷
燬于火時年踰八十手自抄寫火下細書復成二
三千卷盈數十篋時人以為養身靜默之所致著
周易兩繫莊子內篇註易經禮記春秋尚書孝經
論語喪服老子要畧數十卷

褚伯玉字元璩錢唐人雅有隱操徵聘皆不就語在
事紀間嘗一答王僧達之招于吳郡寧朔將軍丘
珍孫欲見之與僧達書曰褚先生滅景雲棲不事
王侯自非折節好賢何以致之昔文舉棲治成安

道入昌門於茲三焉却粒食霞之士不宜久羈望
其返策之日暫紆清塵亦願助為譬說僧達答曰
褚先生從白雲游舊矣古之逸人或留慮兒女或
使華陰成市而此子索然為朋松石介於孤峯絕
嶺者積數十載近故要其來此冀慰日夜比談計
芝桂借訪薜蘿若已窺煙液臨滄洲矣君欲見之
輒當申磬其為人景慕如此

杜京產字景齊錢唐人文學隱操為世所重徵召不
赴具載事紀子栖自有傳

呂道惠餘杭人開舍講學生徒百數人范述曾從惠

授五經

顧黯字長孺鹽官人有隱操與顧歡俱不就辟召

六梁朝

盛紹遠餘杭縣人嘗封關內侯天監二年辭榮嘉遜聚徒數百人以授業沒門人立碑以旌德業

唐

施肩吾新城人元和中舉進士隱洪州修身不仕一孫路富陽人有詩名隱居不仕李穎贈詩云天柱與天月曾居絕頂房言雲求祿晚白日坐家長井氣通潮信窻風引海波平生詩稱在老達亦何妨鄭

谷寄贈云平生詩譽更誰過歸老東吳命若何知已凋零垂白髮故園寥落近滄波酒醒蘚砌花陰轉病起漁舟鷺迹多深入富春人不見閑門空掩半庭荷

顧非熊况子性穎敏一覽成誦好辯說氣焰凌轢爲衆所抑久不第而名在朝野長慶中放榜非熊復下第穆宗恠之詔有司進所試追榜勅賜及第大中間歷盱眙尉慕父風棄官隱茅山

宋

林逋字君復錢塘縣人祖克已仕錢氏爲通儒院學

士逋少孤刻志爲學景德中放浪江淮歸結廬於西湖之孤山真宗聞其名賜號和靖處士詔長吏歲時勞問逋善行草書爲詩孤峭澄淡居西湖二十年未嘗入城市杭守王隨每與唱和訪其廬出俸錢以新之李及薛映每就見清談終日逋嘗畜兩鶴縱之則干霄久焉復入樊中時泛小艇遊西湖諸寺客至則一童應門延坐開籠縱鶴必棹船而歸蓋以鶴爲候也將終有詩云湖上青山對結廬墳前修竹亦蕭疎茂陵他日求遺稿猶喜曾無封禪書卒年六十一初逋客臨江李諮始舉進士

逋謂其有公輔之器逋卒而諮守杭爲服總與其門人哭而葬之舍側刻臨終一絕納壙中仁宗賜謚和靖先生仍賜其家米五十石帛五十匹逋不娶無子教兄子宥登進士第諸孫大年始集其詩行于世逋性高逸多學而有大名一時公卿莫不慕仰梅堯臣序其詩謂談道則孔子孟語文則韓李趣向博遠直寄適於詩爾歐陽修曰自逋之卒湖山寂寥無有繼者其爲名公推重如此

陸維之字永仲一名凝之字子才號石室餘杭人丰神雋拔議論倜儻少以計偕入汴群法從邀與雜

坐命相者某道人視之道人指維之曰秀才叩以科第則曰且歸山道人揖別贈以粒丹緩急用之陸下第南歸舟循汴風激浪怒舟不能勝以丹投之風浪始息汴上有呼其姓名者則道人也維之遂有超世之志隱於大滌洞天石室人因以石室稱之逍遙林谷詩酒自樂光堯嘗召之辭疾不赴後光堯幸大滌憲聖亦侍羽流起居問以山中詩客以維之對進其詩光堯讀數首太息曰布衣入翰林可也欲與孝宗言憲聖曰山林隱士必不要人知要他出山却是苦他遂止未幾卒有石室

小隱集二十卷行世

王衷字天誘政和中郡守監司表薦賜號悟靜處士視朝請大夫俸給

徐奭徽宗朝賜號冲晦先生故廬在城中吳山下又嘗居萬松嶺下

徐立之舊名炳學老子法隱於杭西湖之廻峯人呼廻峯先生通判都官員外郎蘇爲嘗謂之曰何不仕乎曰若時與命會可以佐天子福元元不然悔吝生矣曷若追冥鴻霧豹與孤雲俱爲敬其言爲著傳廻峯今雷峯也

元

鄧牧字牧心錢塘人生十餘歲讀莊列二子書悟文法下筆追古作者不事榮名遍游名山大川歸隱大滌山人稱爲文行先生所居有超然館宴坐累月不出時時作詩文以自娛每一篇出人爭相傳誦與葉林李坦之友密石塘胡長孺爲作傳所著有洞霄記游山志雜文稿

張天雨字伯雨錢塘人宋文忠九成之裔早棄妻子從開元宮工壽衍爲徒風裁凝峻見者知其爲方外高士工書善詩散文益竒古與吳興趙孟頫

城楊載蜀郡虞集豫章揭傒斯清江范梈金華黃潛交甚善嘗屏居修茅山志因自號曰句曲外史陳涓叟杭人讀書學道不混俗不忤物賦詩有天然趣隱居葛溪上歲一來杭城中名人勝士爭要致之惟恐其去也所著紫陽編 卷葉森類集題詩云一度詩來一見 若只應芳杜襲蘭薰有時寫到游仙句繞筆秋香生紫雲

朱景仁海寧人號貞曰道人事親孝有異母兄二事之甚恭順同居共爨未嘗少離待宗族煦然有恩外嫻亦如之交友敦教相恤之義元季之亂四方衣

杭州府志卷之七十六終
冠之士避地海寧景仁周給之徵辟不就已上俱隱逸

萬曆杭州府志卷之七十六終

萬曆杭州府志卷之七十七

人物十一 國朝忠義

于謙字廷益錢塘縣人永樂庚子舉于鄉明年辛丑
登進士第謙生而秀朗自少以穎異聞方七歲時
僧蘭古春見而竒之曰此他日救時宰相也讀書
過目輒成誦作文如雲行泉湧才氣逸發援筆千
言頃刻立就詩亦清麗宣德改元授山西道監察
御史從討漢庶人庶人就縛

上命數其罪惡謙卽於

上前信口傳旨詰責數語辭義嚴正庶人伏地流汗

朝宁傾聽咸嘆不及

上喜師旋頒賞與諸大臣等盖屬意欲用之矣巡按江西發奸摘伏釐剔宿蠹殆盡平反寃獄稱爲神明五年河南山西告災

上親擢行在兵部右侍郎巡撫二省乃徧歷梁晉諸郡邑問民疾苦而振卹之典利祛害如馬政河防民租軍賦悉皆擘畫咸著爲令謙嘗自河南至山西過太行山遇盜數十方劫財謙自車中叱曰何爲者羣盜卽駭散其威望素著如此正統改元上復宜十事歷九載轉左侍郎薦孫原貞王來自代

忌者嫉之降大理左少卿兩省耆老赴闕乞留

者合萬人仍復巡撫前後一十八年每入京議事單車輕裝未嘗攜一物有詩曰手帕蘑菇與線香本資民用反爲殃清風兩袖朝天去免得閭閻說短長殆紀實也兩地皆尸祝之十二年復右侍郎還部十四年虜酋也先入寇

上欲親征舉朝力諫不聽尚書鄺埜扈行因攝部事師次狼山失利

上遂北狩 京師震驚 郕王監國攝朝臺諫廷劾王振罪惡 監國未有處分錦衣指揮馬順素

附振叱衆衆怒擊順死并索毛王二長隨廷中大
譁 監國疑懼欲起避謙升陛掖止之亟請命將
軍瓜擊二長隨死以謝衆又請 諭羣臣王振罪
應赤族俟啓

太后行誅順罪應誅擊死勿論衆遂定退 朝下冢
宰直深服謙鎮定之功語在事紀

太后懿旨卽擢謙兵部尚書乃調兵爲守禦計內外
倚爲安危九月

皇太后以國勢危疑 太子冲幼諭百官以 郕王
年長爲 上親弟宜卽

皇帝位以嗣大統安國家遙尊

上爲

太上皇帝明年改元景泰時三營精銳盡簡征行留
者皆老弱難用乃泣告

上曰虜賊不道遮留

上皇將長驅深入宜預爲計急遣官募義勇集民夫
更漕卒練京營令工部備戎器戶部調糧餉傳檄
邊鎮及山東西關陝備虜或迎擊其前或邀遮其
後並授方畧十月朔內侍喜寧導也先給云

上皇還京五日入紫荊關京師戒嚴侍講徐珵妄言

占象倡議南遷諸大臣皆依違莫決謙慟哭抗言
京師斷不可離且引宋南渡爲鑒語甚剴切亦在
事紀中當是時謙銳身任事舉朝旣瞻視之而其
言又能感人羣心始定乃奏用王通楊善守京城
孫鏗衛穎張輒雷通分兵出守諸要害監以王竑
葉盛程信諸給事以石亨楊洪柳溥爲總兵盡移
郭外人民芻粟入城堅壁清野通州儲粟百萬急
散官軍餘令人得自取之勿以資虜頃刻立盡謙
躬擐甲胄率先士卒以死自誓泣諭三軍國恩大
義事機一失禍患立至生不如死人皆感奮勇氣
百倍十一月也先擁衆至城下謙及亨統兵出陣
虜見我師堅不可撼喜寧噉也先令邀大臣及謙
出議和索金萬萬計衆相顧不能決以問謙謙曰
吾本兵知有軍旅他非所敢聞卽出德勝門約戰
以

上皇在虜中不敢動已謀知虜移

上皇西我軍發巨礮擊之虜死者數千計也先大沮
衆請進擊謙曰

上皇在虜中不可不慎請出 御榜潛遺虜中諸夷
有能擒斬也先來獻賞萬金爵國公以疑虜心也

先果遁去論功加少保力辭不允衆皆稱再造功
謙曰四郊多壘卿大夫之耻城下不盟幸耳何足
爲功大同叅將許貴乞與虜和謙請 旨詰責大
勵各邊戰守分遣諸將領屯真保通涿易五路各
監以文臣又令驍將楊俊督之俄虜逼朱謙于關
子口襲寧于鴈門關羽書至 京師謙請自將大
舉北伐會虜退而止因思喜寧在虜告以虛實屢
導入寇不以計除之虜卒難禦計授楊俊擒寧伏
誅也先果悔禍遣使請奉

大上皇還京遂議遣使羣臣顧望不能解遂謙曰

天位已定誰復異議惟君臣大義兄弟至情自當
遣使奉迎

上喜從其言二年三月

上皇至大同出塞去六月又至大同七月我使再出
奉迎八月

上皇發塞外九月丙戌至京居南宮謙薦王忠肅公
至遼東召還院是年五月立懷獻太子加太子太
傅十月謀虜南侵遣孫鏗石彪出大同楊寧衛穎
出宣府叅政葉盛叅贊獨石八城軍務是年也先
弒其主脫脫不花而自稱曰盛大可汗遣使入貢

十月議立十營團操石亨請官其子因以冕爲府
軍前衛副千戶力辭不允御史顧暉言六部諸夫
政乞會內閣議可否條奏該部不得自專于其疏
廷議謙抗言曰

祖宗成法國家重務並所司奏請處分臣知遵
祖宗重

君命他不敢從先是也先犯京師脫脫不花寇遼東
不樂出寇陝西浙江葉宗留福建鄧茂七廣東黃
蕭養各擁衆數萬僭號攻城南蠻西番亦復騷動
訛言萬端變在呼吸謙內固京師外籌邊務計走

強胡控扼漕渠開鎮臨清收復獨石八城留貴州
藩臬調畫事理動中機宜僚屬受成相顧驚服卒
之狂胡欵戢羣盜削平 宗社奠安海宇寧謐有

旋乾轉坤之功事定讓勞于下退然不居獨秉

朝綱文武大臣面酬進退 宮庭密勿接膝調停

廉清公正一錢不私力辭 賜第止宿直房五十

喪妻旁無姬媵所居猶先世故廬田僅數畝給餽

粥而已食不兼味衣不重采因葬親徒步還鄉不

煩輿傳昔泣梁晉止乘騾轎大璫舒良及亨等亦

皆敬憚莫逞亨尤忌其正直難犯屢辭兵柄而謙

亦辭總督以安其心

上爲諭解亨姪彪驍鷲稍裁抑之亨請出之大同以遠踪跡嘗卧病中官更番來視見其家具蕭然因入言狀

上特勅上方繼供資用藥湏竹瀝

上幸萬壽山伐竹取瀝賜之時言官論其柄用太過上意益堅羣猜競起讒毀橫生八年正月會

上疾彌留久不視朝乃合廷臣上疏請復

憲廟于東宮期必得請疏再上至闕門而石亨等于是夕奪門迎

上皇于南宮復位誣其與內閣王文中官王合謀迎立外藩而都御史蕭維禎與文有隙又憾謙屢抑其私乃攘臂欲殺之奏其迎立外藩謀危社稷

英廟持之不下徐有貞進曰不殺于謙則今日之事爲無名意遂決有貞卽程前倡議南遷者又嘗祈謙薦爲祭酒而謙不納故憾之謙自知功高忌衆不復自辯但云召外藩非金牌不可牌藏內府豈外廷所能得遂就刑時年六十歲籍其家無長物惟欽賜盔甲袍帶及元寶銀二錠而已子冕戍

龍門衛死時天日驟變陰霾蔽空四海冤之遺骸
莫收都督陳達密賂守者收付養子康痊焉

皇太后聞知痛惜累日罪

上何不留謙

上深悔悟未幾陳汝言代爲尚書以賄欺

上曰謙囊橐罄懸而汝言贓穢山積相去真天淵矣

亨等在傍悚然慚懼俄有邊警廷議紛紛恭順侯

吳瑋對

上曰使謙若在虜不至此

上默然

茂陵雖中遭廢厄亦念其勲績當收謙時事起倉皇

不及申救每爲歎惜及卽位首赦冕復官還其沒

產諭祭文有曰

先帝已知其枉而朕心實憐其忠里人卽故居建憐

忠祠以祀之弘治三年 誥贈太傅諡肅愍命有

司建旌功祠于墓所春秋致祭世襲杭州前衛副

千戶冕仕至應天府尹自有傳李夢陽曰賊酋擁

太上皇至大同城下勒降也大同人登城謝曰賴

天地宗社之靈國有 君矣至宣府城下宣府人謝

亦如之至京城下京城人謝又如之於是謙颺言

曰豈不聞社稷爲重君爲輕斯言也事以之成謗以之生者歟且東宮之易南宮之錮二者有能爲公愬者否耶故常時有不如意輒拊膺忿曰此一腔血不知竟灑何地顧其言孰非酸鼻流涕者嗟乎傷哉

善曰當理倡議南遷羣臣觀望莫敢發一語者非公力折之天下事去矣夫成敗之機捷於呼吸持危定傾惟才與智然惟忠於社稷者斯有社稷功焉乃公所以握樞天衡轉輪日轂者恃忠與義耳獨才智云乎哉

胡世寧字永清仁和縣人選爲昌化諸生弘治六年進士家貧力學志節清峻長益韜戩留心世務以弘治五年舉於鄉舉於鄉者有司給道里費人百金世寧以浙右歲饑獨受五十金而行明年舉進士歸進士得旌其門時滇關請鎮守中貴人世寧重折節棄之去初爲德安推官陞南刑部主事歷郎中與李承勛魏校余祐友善相切磨問學時稱南都四君子弘治十八年春詔求言條上十事其一言用人宜立賢無方先朝李賢薛瑄入內閣不由翰林翰林如胡儼劉球不由庶吉士年富以教

官爲給事中王翺以大理左寺正復爲御史今一切敘轉拘泥科條以故不賢抑塞朋類引援乏人佐理其來有漸出爲廣西太平知府太平遠惡領土官世寧訪接以禮不擾一錢翕然帖順一檄創壺關萬夫畢集工費數千金皆土官辦納不數旬關成太平州李濬淫刑撓法莫敢詰世寧密授方畧龍英土知州趙元珪元珪禽濬來獻元珪者濬外兄也土官世及輒屢轉結勒索賂土夷土夷以故怨叛益輕中朝士人世寧令土官生子卽聞府子弟應世及者年且十歲朔望或有事調集皆攜之見太守太守爲識年數狀貌父兄有故按籍爲請官於朝土官大悅服謂胡太守仁廉內艱歸土人走送者數萬服闋北上過滄州會流賊攻州世寧入城爲州防守賊攻城不能破去補寶慶知府清儉節約公廉有威藩府人不敢恃盡平其役賦當是時川蜀江浙盜起陞江西按察副使兵備東鄉東鄉盜藪世寧鋤強撫順東鄉得以安戢督戰裴源及廣昌城三邑時都御史俞諫用兵柅源又無功寧庶人有逆謀世寧上平賊二策惟勦與撫今素無定見恩威倒施事多展轉賊益無忌憚惟

舊撫者不勦新叛者不撫再起者必撲滅于微持
此三端官有定守民有定志戢戰興農救傷恤困
治安之效可尋崩解之亂可息不然民窮財盡兵
連禍結後患未涯殷憂方盛又恐江西之患不止
盜賊最可憂者天旱日久赤地千里水泉亦竭田
禾無收麥種難下來歲民饑賑救無備省城被火
延燒萬室基地所存盡歸王府債負所責閭閻破
家庄田所逼村落結寨三司官多被鈐束錢糧刑
名奉行府案近者買辦漸行於外府騷擾遍及於
窮鄉臣恐此不善處則良民不得安生聚爲大盜

臣下恐有隱禍多懷二心禮樂政令漸不自朝廷
出矣寧王懿親多才豈有毫髮過議但內外臣僚
輔導非法自因逆瑾得復護兵以來威勢日盛上
下官司承奉太過伏乞 聖明廣集羣臣及江西
鄉土有識士夫會議推舉才望服人公忠體國不
避權勢不惑浮議大臣一人兼任提督巡撫之職
假以陳金彭澤之權使其統御將帥調度兵食激
揚清濁勿置官吏興革利弊皆得便宜新舊盜賊
應勦應撫或先或後悉聽計畫萬全奏聞區處久
困窮民妙選循良曲加撫綏早期休養務使安全

更乞溫詔戒諭賢王益崇謙順遠避嫌疑仰遵祖訓止治國內官僚江西藩臬郡縣應有政務尊事朝廷奉持常憲毋得交私罔上徇情廢法該府更宜嚴戢官闈恪守禁例施舍已責惠及貧民庄田基址悉還原業再有稔惡不悛及投充撥置者法司提問如例更乞嚴勅鎮撫以下官欽奉

文皇聖旨事例凡遇王府發故事務必須奏准方許奉行庶幾小民有再生之望地方無意外之虞宗室有磐石之固九重舒南顧之憂疏上宸濠大懼徧賂權奸朱寧蕭敬張銳等及兵部尚書陸完都御史石玠坐以誹謗妖言離間罪必欲殺之以絕言者先是世寧已陞福建按察使乞休未允歸抵家宸濠徧遣兇徒挾

上旨襲世寧巡浙御史潘鵬附宸濠盡囚其家人索之甚急會李承勛為浙按察使匿世寧使變姓名間道歸命京師得不死下錦衣獄獄中三上書言江藩之逆且自訴其忠赤語在事紀中而兩京言官程啓充徐文華輩並疏論救諸奸亦懼後事未可知竟從末議謫戍瀋陽居四年宸濠果反始起謫籍除湖廣按察使未任嘉靖初擢僉都御史巡

撫四川上疏勸脩德講學且條奏四川爲土蕃所苦餉道梗阻乞用入理財增兵將明賞罰未幾召爲吏部右侍郎未上外艱去服闋乞休時大禮議未決江淮饑人相食世寧疏乞早定大禮赦小過簡賢求治疏成不果上聞羣臣伏闕爭大禮得罪又疏言羣臣心欲效忠詞乃過激乞擴然開釋消除疑阻以圖治安召爲兵部左侍郎上京陳邊備二十五事又上大學仁人能好惡洪範惟辟作威福臣無得僭易大傳不出戶庭無咎講議三章疏上留中言官因劾其告密世寧奏乞下臣所上章

宣示中外引罪求去不允又上知人官人二十事尋以病乞改南京吏部侍郎未幾擢南京工部尚書以左都御史召改刑部尚書霍南海言世寧廉直宜總憲加太子少保仍右都御史提督團營尋復刑部尚書永嘉柄國惡陳九疇世寧力爭九疇忠勇有功河西不可殺九疇快奸回輕中國九疇得不死風霾詔求言上勤學恤民任官十事轉兵部尚書加太子太保力辭至三疏言外虜方強內憂日甚天下之人闔然皆無忠義之氣我朝尚書兵部者臣鄉里所聞方賓于謙耳目所迨劉大夏

彭澤竭忠徇國不得保全其幸免者依阿軟媚坐視養亂者也援姚崇李綱故事上定武畧崇憲職重將權增武備更賞罰馭土夷足邊儲絕弊源正謀謨惜人才十事要說時安仁倡言太平勸

上銷兵典禮樂世寧又特疏申論武畧人才二事上知其忠鯁促上任議行十事世寧議棄哈密不可勞中國奔命小夷閉關絕貢便苦酋沙保本未誅矯誣請賞事當勘正又上武備人才邊儲三事已而引疾力辭竟去逾年又召爲南京叅贊機務兵部尚書辭不起嘉靖九年九月端坐而逝贈少保

謚端敏世寧樸忠直諒氣壯才雄問學淵深優於經濟澹泊寧靜清素不淆席文襄稱其論事如結舌草奏如懸河邵康僖曰胡公疾惡如讐善則猶已余兩爲屬吏手書勉余以忠孝大節其欲成人之美若此在兵曹不數月夙弊大奸釐刷殆盡議哈密與南海不合論芒部功王子衡以爲發其過及薦賢才安仁以爲侵官相壓亂政發怒訴于朝哈密土魯䟽制置極詳土魯番結曲先衛人牙木蘭爲將牙木蘭擁帳內徙歸我土魯番遣使來降而大臣卽欲縛牙木蘭與之易哈密世寧議曲先

衛本中國羈縻牙木蘭反正歸順非納叛比而哈密空城懸遠無益事實土魯番善賈多巧術往往以珍奇啗時貴自成化至於今中國爲彼欺負今欲甘心牙木蘭以攜貳我屬夷而以哈密爲餌釣大利宜勅王瓊爲國忠謀先盡復瓜沙羽翼之地悉收亡失屬夷封植哈密永爲不侵不叛之臣而後請勅降印庶不辱王命且土魯番方恫喝中國懸衡諸夷但遠越流沙烏合難久我大振威畧以離其黨購賞義附使相破滅此伐交之術正宜厚牙木蘭以風蠻夷及薦馬昊施儒楊必進及九疇爲將皆不報河西之議語侵永嘉彭澤陳九疇得免竒禍昌化嗣伯下廷議世寧言吾輩不得以厚賂故誣朝廷安仁色變大沮以故諸大臣皆忌欲去之其論大禮是永嘉安仁說竟不肯相依附賴上明聖憐其忠鯁始終眷注云有奏議若干卷行於世

善曰人之言曰千鈞之弩一發必鵠胡公以宸濠一䟽遂名無窮謂當機而發耳此其視公淺淺哉夫公有忠義大節當柄兵時屢持正議輒與諸朝貴忤彼豈擇利而居者予嘗讀公奏議多明辨

慷慨不能盡槩諸用乃為有經濟幹畧者耶已上
具忠義

夏誠字克誠錢塘縣人由舉人正統初任沙縣教諭清慎有志操部使者上其賢擢監察御史已巳車駕北征誠扈從至土木乘輿陷虜中誠死於難後朝廷追錄死事忠勤官其子繼先至撫州知府衣興錢塘衛千戶戰諸暨有奇功不為自伐又嘗解銀甲易粟以食饑卒王師進攻雲南請為前鋒力戰死詔贈官賜祭語詳事紀中已上
死事

萬曆杭州府志卷之七十七終

萬曆杭州府志卷之七十八

人物十二 國朝風節

梁大舉字仲仁成化志字與名互異錢塘人刻厲尚風節洪武

間以人材徵授陝州判官卓有異政清白聞遠邇以母老辭歸永樂初召入賜勅還語在事紀壽七十三卒大舉家素饒裕而自奉儉約好士喜施長身高論在衆人中昂然野鶴鷄群也

童真字守正仁和縣人永樂中由貢生拜監察御史巡按四川忠誠端恪風紀振揚為政不求近名而孜孜奉公惟知自靖擢山東副使食正三品俸秩

既滿待次天官當事者諷求一見真不往又使人至其邸真托疾偃卧不與交一言遂徙官廣東真卽解官歸貫橐單鮮識者高之

褚讓字克卿仁和縣人幼警敏力學登永樂甲申進士授禮部祠祭司主事歷吏部文選員外郎清介特立土苴貨賄遇人餽遺輒厲聲曰若謂天下無關西漢字耶凡諸權貴造請一槩峻絕當事者寔不能平出爲山西叅政未幾乞閑卒於家

張銓字文衡仁和縣人吏部郎中信之孫太僕丞璜從子也成化辛丑進士官刑部主事爲人耿介不

阿剛方直諒多挺挺大節時尚書南宮某公事多偏徇銓據法執爭不已尚書心切憾之竟亦莫能奪也冢宰屠公某者與銓有葭莩親銓絕不與通適屠有慶事僚友期與偕行銓義不往屠大憾之以爲輕已人有薦銓者屠不應惟直視賀軸以其無銓名也銓在刑曹十八年風節愈勵家貧甚夫人常糊紙錠以給衣食竟以廉介不求出爲廣西叅議舟覆水死

善曰銓以正自持義不昵所親以媒進取其峻節高風卽賁育莫能奪也然久滯郎曹徙官粵徼而

竟以水死豈非命耶

許相卿字台仲海寧縣人正德丁丑進士辛巳授兵科給事中屬世皇新政乃抗疏論政令不便者數事先是中人張銳張忠恣橫法曹議在死律內降欲當之贖金相卿力爭之又李賢以中貴張欽義子襲錦衣指揮林俊以正人被言者譖相卿皆力言其非是語剴切多人所不敢言至嘗上為氣驕志怠迥異初心云云舉朝皆為咋舌由是許給諫直聲震天下居一年抗疏致仕歸縣官具輿臺騶隸如常相卿曰此役屬里閭吾故里中

人也假令吾乘軒擁蓋揚揚出里中使吾父老親故走匿旁舍此於事不當吾誼已不入公府毋徒患苦父老為也堅却之乃築室紫雲山中巖居川觀食力詠志益務覃思墳籍游心術藝之場常製短策長笠以二鶴自隨遇佳日披策戴笠身騎黃犢往來阡陌間喜與田翁野叟為爾汝交就彼食飲或一言目為貴人輒投袂起矣縣令高其賢為樹表邑中念當一往謝則五鼓伺門入向縣治再拜而去時令卧未起卒不能禮之館舍部使者歲時存問餉之金錢輒推不受元輔貴溪與相卿善

貽之詩有九杞山人不出山不將一字落人間之
句相卿爲人豪邁正直高視一世林居三十年海
內咸傾仰之中外薦者以十數嘉靖己亥以禮科
給事中 召起於家部使臨門教逼上道相卿力
以疾辭元輔爲書招之曰 明天子在上故人忝
備政府可強爲一出相卿報曰居高者勞乃公方
飽食無溷乃公竟不往後海上變起當路者就問
籌策相卿爲口畫便宜事語多效其清風峻節老
而彌壯士大夫識不識輒相敬慕咸謂人中孤鳳
云

善曰許公之危言犯 主有汲長孺之風焉已而
辭榮軒冕混迹田父雖公府交辟不移林壑之尚
遠心哉若人可謂安而貞矣

高儀字子象錢塘人嘉靖辛丑進士二甲第一人選
庶吉士授編脩陞司業晉南京翰林院侍講學士
擢太常卿掌南雍歷禮部左右侍郎尋改吏部兼
學士掌翰林院進禮部尚書至

穆宗朝爲尚書者四年引疾歸加太子少保歸甫二
年歲辛未以前官 召起教庶吉士明年壬申
詔侍

今上講讀於 文華殿未幾進 文淵閣大學士甫

一月卧病值

莊皇帝大漸強起趨 玉几前受 遺命儀哀慟

先皇疾益增劇竟卒於京邸

上為輟朝遣中官賜恤優厚贈太子太保謚文端儀
生而凝重坦夷不為矯激刻削之行而風節凜然
不可犯初入史館時已卓犖為人所推時柄臣方
以爵祿寵致天下士多方羅之儀獨抗顏不下大
忤其意坐是久不調其掌南院殆踰三年後入館
者皆躡其上而儀處之燕如也及柄臣解政始得

稍稍進用逮事

莊皇新政乃出 御前殿正 黼屨以臨羣臣 郊

見

上帝 親耕籍田

駕臨辟雍凡諸大儀節皆倚辦於儀考據精核旁蒐

懿典諸種種如禮

孝烈皇后以保衛功 祔

世皇廟儀建議

孝潔實元后久正位 中宮 二后不宜並祔乃遷

孝烈於 內殿 朝廷合祀天地以日月從至嘉靖

間改分祀中官李芳建議請合祀儀執不可人問其故儀曰卽無論分合非是獨柰何使中官得與朝議時芳貴寵赫天下儀視之蔑然 朝論偉之先是宗藩鄭王駙馬鄔景和皆以建言得罪衆莫敢理之儀首倡議請復封爵釐正先朝諸大臣謚議其諸宗室乞恩大臣卹典當與者輒爲上聞不俟其請不當與者因弗與卽朝貴交請之弗聽也每中貴與諸大臣言或欲有所請屬至儀輒有難色且曰高尚書視官如敝屣吾儕柰何得以私干之其見憚如此有一男子自南宮中門入口稱是孝烈后子衆相觀莫可誰何儀叱從吏收縛竟劾得其詐置諸憲典人以方雋不疑彼引經斷獄非是乃儀不費辭說過不疑遠矣方

穆宗初年上疏諫 南苑遊幸及選女採玉取光祿羨銀等事皆人所不敢言正色立朝不與時俯仰難進易退士大夫咸服其高天下稱爲正人卒之日無間識不識莫不惜之有泣然出涕者儀以身係天下重輕故其感人若是始生時父贈君蓋夢肅愍公及長語儀儀益自負慕肅愍之爲人今觀肅愍處 景皇時力抗 國難有再造之勲世稱

社稷臣儀居 明聖朝為太平宰相無忠節可見
然直已守正人謂招之不來麾之不去庶幾古社
稷臣賢乎文端無媿方肅愍矣

善曰吾杭人 國朝二百年無拜相者受相自公
始乃不二月遽卒豈非天哉公大拜雖不久然親
承

先皇玉旨受 遺言為 顧命大臣故恤典特隆

遣官護喪營葬皆極優厚生榮死哀視于公獲全
社焉予故素善公又為同年友故為論敘委竟若
此儀身被 三朝奈遇諸 遣代祀典試諸命及

受 御 前珍膳金綺之賜種種不能悉記姑列
其大者

杭州府志卷之七十八終



